



## **Maktabgacha yoshdagi bolalar bilan muloqotni tashkil etishda pedagogik yondashuvlar va tarbiyaviy tamoyillar**

**Rasulova Gulxayo Madaminovna**  
Qo'qon Pedagogika kolledji direktori

**Anotatsiya.** Ushbu maqolada maktabgacha yoshdagi bolalar bilan muloqotni tashkil etishda pedagogik yondashuvlar va tarbiyaviy tamoyillarning ahamiyati yoritilgan. Bolalar bilan samarali muloqot o'rnatishda pedagoglarning kasbiy mahorati, kommunikativ kompetensiyasi hamda individual yondashuvning o'rni tahlil qilingan. Shuningdek, muloqot jarayonida bolalarning ijtimoiy, emotsional va nutqiy rivojlanishini ta'minlovchi metod va usullar ko'rib chiqilgan.

**Kalit so'zlar.** Do'stona muloqot, ishonch, ma'naviy-tarbiyaviy, tarbiyachi, tarbiyalanuvchi, ta'lim-tarbiyaviy, temperament, ijtimoiy muhit, odob normalari, qoidalari.

## **Педагогические подходы и воспитательные принципы организации общения с детьми дошкольного возраста**

**Расулова Гулхаё Мадаминовна**  
Директор Кокандского педагогического колледжа

**Аннотация:** В статье рассматриваются педагогические подходы и воспитательные принципы организации общения с детьми дошкольного возраста. Анализируется роль профессионального мастерства педагога, его коммуникативной компетентности и индивидуального подхода в установлении эффективного общения с детьми. Также освещаются методы и приемы, способствующие социальному, эмоциональному и речевому развитию детей в процессе общения.

**Ключевые слова.** Дружеское общение, доверие, духовно-просветительский, воспитатель, образованный, образовательно-воспитательный, темперамент, социальная среда, этикет, правила.

Maktabgacha ta'lim tizimi bolalarning shaxs sifatida shakllanishida muhim o'rin tutadi. Ayniqsa, ushbu davrda bolalar bilan to'g'ri va samarali muloqotni tashkil etish ularning ijtimoiy, emotsional va nutqiy rivojlanishida asosiy omillardan biri hisoblanadi. Muloqot jarayonida bola atrof-muhitni anglaydi, o'z fikrini ifoda etishni o'rganadi va jamiyatga moslashish ko'nikmalarini shakllantiradi. Maktabgacha yoshdagi bolalar bilan muloqotni samarali tashkil etish pedagoglardan yuqori darajadagi kasbiy mahorat, kommunikativ kompetensiya va individual yondashuvni talab etadi. Pedagogik

yondashuvlar orqali bolalarning yosh va psixologik xususiyatlarini inobatga olgan holda muloqotni tashkil etish, ularning faolligini oshirish va mustaqil fikrlashini rivojlantirish mumkin. Shu bilan birga, tarbiyaviy jarayonda insonparvarlik, izchillik, tizimlilik va individual yondashuv kabi tamoyillarga amal qilish muhim ahamiyatga ega.

Tarbiyachining tarbiyalanuvchilar bilan muloqoti samarali bo‘lishi uchun suhbatdoshni o‘ziga moyil qilib olish zarur. O‘zaro moyillikka erishish uchun amalda qo‘llanilib kelinadigan bir qator murakkab bo‘lmagan pedagogik ta’sir etuvchi usullardan foydalaniladi. Ularning eng muhimlari tarbiyalanuvchi *ishonchini qozonish hamda ta’sir etish va ma’qullash* usullaridir.– ***ishonchini qozonish usuli*** tarbiyalanuvchilar bilan muloqot asosida ta’sir ko‘rsatishning yuqori samara beradigan usulidir. U tarbiyalanuvchi ongiga qaratilgan bo‘lib, idrok qilish orqali o‘quvchilar ishonchini qozonishni va ularning roziligini nazarda tutadi. Ishonchini qozonish dalillash, isbotlash orqali olib boriladi. Ishonchini qozonish usuli yordamida tarbiyachi tarbiyachilarning dunyoqarashini shakllantiradi, ularda o‘z-o‘zini tarbiyalashga nisbatan javobgarlik hissini oshiradi.

Ishonchini qozonish usuli nafaqat tarbiyachi bilan muloqot jarayonida, balki ta’lim-tarbiyaviy faoliyatdan tashqari holatlarda ham tarbiyalanuvchiga ta’sir qiladi. Tarbiyalanuvchi ishonchini qozonish ijobiy yoki salbiy natijalar paydo qilishi ham mumkin. Tarbiyachi ishontirish bilan tarbiyalanuvchida ijobiy hislatlarni uyg‘otishi uchun tarbiyaviy metodlarni o‘z o‘rnida qo‘llashi shart. Tarbiya jarayonida har bir tarbiyalanuvchining o‘ziga xos xususiyatlarini hisobga olishi zarur. Tarbiyalanuvchilarning qobiliyat va iqtidorlari, qiziqishlari, irodaviy hislatlari har xil bo‘lgani uchun bir tarbiyalanuvchiga nisbatan foydali bo‘lgan ishonchini qozonish usuli, boshqasiga zararli bo‘lishi mumkin. Shuning uchun har bir tarbiyalanuvchining ruhiyatini, psixologiyasini, ichki dunyosini tarbiyachi muntazam o‘rganib borishi, tarbiyalanuvchilarning o‘ziga xos xususiyatlarini, tarbiyalanuvchi temperamentining umumiy tiplarini o‘rganish metodikasini bilish lozim. Masalan, ko‘rish va eshitish qobiliyati, faolligi, tez anglashi, sust fikr yuritishi, hovliqma yoki vazminligi, sergap yoki kamgaplighi, serg‘ayrat yoki g‘ayratsizligi, yalqov yoki tirishqoqligi, pala-partish va chala ishlaydigan, yoki ishga tez kirishib ketishi kabilar nerv faoliyati tizimiga bog‘liq bo‘lib, tarbiyachi tarbiyalanuvchilar ishonchini qozonishi uchun ularni bilishi va zarur bo‘lgan xulosalarni ishlab chiqishi shart.

Tarbiyalanuvchilar ishonchini qozonishning yana bir muhim xususiyati tarbiyalanuvchilarni shaxs sifatida rivojlanishida o‘z-o‘zini tarbiyalashidir. O‘z-o‘zini tarbiyalash tarbiyalanuvchining o‘zini o‘zi idora qilishi, o‘zida erkinlikni, ijtimoiy mavqeini, tashabbuskorlik va mustaqillikni shakllantirishdir. Tarbiyalanuvchining yashirin qobiliyatlari o‘z-o‘ziga ishonch orqali yuzaga chiqadi. Tarbiyalanuvchi uchun o‘z o‘zini baholash qiyin jarayon. Tarbiyalanuvchi ta’lim-tarbiya berayotgan tarbiyalanuvchilarga ishonch bilan ergashib, o‘ziga nisbatan ishonch ruhida tarbiyalanar ekan, unda avvalo, mustahkam iroda shakllanadi, o‘z burchini to‘g‘ri tushunadi, bilish va o‘rganishga qiziqishi kuchayadi, o‘z-o‘zini har tomonlama takomillashtirishga intiladi, o‘ziga atrof muhitdagi o‘rtoqlari ko‘zi bilan xolisona baho beradi, o‘ziga ishonadi va unda qoniqish hissi paydo bo‘ladi. Xarakteridagi salbiy odatlarni, zararli sifatlarni tez anglab, ularni yo‘qotish va bartaraf etishga intiladi.

– *ta’sir etish va ma’qullash usuli* muloqotning umumiy jarayonidir. Ikki suhbatdoshning bir-birlariga ta’sir ko’rsatishlari, tarbiyaviy maqsadni ma’qullatirish vositasi sifatida o’ziga xos xususiyati shundan iboratki, ushbu usul vositasida tarbiyachi tarbiyalanuvchi ruhiyatiga va xulq-atvoriga tarbiyaviy maqsadni ko’zlab sezilarsiz ravishda psixologik ta’sir ko’rsatadi. Tarbiyalanuvchi psixikasida nazoratsiz kiradi. Ushbu usul, muloqot jarayonida tarbiyachi tarbiyalanuvchilarda axloqiy-irodaviy hislatlarni faol takomillashtiradi. Tarbiyachi xushmuomalaligi, muosharat odobining cheksiz qudrati bilan tarbiyalanuvchilar psixikasining anglanmagan qirralariga pedagogik ta’sir etadi, tarbiyachi va tarbiyalanuvchining yaqindan muloqotda bo’lishini, bir-birlariga ishonchini, topshiriqlarni ma’qullab vaqtida bajarish uchun javobgarlik hissini shakllantiradi.

Tarbiyachi tarbiyalanuvchilar jamoasi bilan pedagogik muloqotni har tomonlama mukammal tashkil etish va ko’zlangan maqsadga erishishi uchun tarbiyaviy jarayonning jamiyat talablariga mos keluvchi etakchi *tamoyill*laridan o’rinli foydalanishi lozim:

Aslida muloqotdan maqsad tarbiyalanuvchilar bilan do’stona munosabatni ro’yobga chiqarishdir. Tarbiyalanuvchi shaxsini hurmat qilish tarbiyachining insonparvarlik tuyg’ularidan kelib chiqadi. Tarbiyalanuvchi shaxsini hurmat qilish, ularga cheksiz mehr-muxabbat ko’rsatish va ularga ishonish shart. Bolalarga nisbatan hurmat tuyg’usi ularning kuchiga kuch qo’shadi, o’z imkoniyatlariga ishonch tuyg’usini shakllantiradi, tarbiyaning samaradorligini oshiradi. Tarbiyalanuvchi shaxsini hurmat qilish va munosabatni adolatli talabchanlik mezonlari asosida qurishdir. Do’stona muloqot tarbiyachi bilan tarbiyalanuvchi o’rtasidagi bilimlarni puxta o’zlashtirilishini ta’minlaydi va mukammal shaxsiy fazilatlarni tarkib toptirishga xizmat qiladi. Pedagogik jarayonda sodir bo’ladigan muomala odobi tarbiyachilarning axloqiy madaniyati, tarbiyalanganlik darajasida aks etadi. Tarbiyachining o’ziga va o’z kasbiga, o’quvchilarga bo’lgan munosabati uning muloqotida yaqqol namoyon bo’lishi mumkin.

O’z faoliyatini endigina boshlagan tarbiyachilar ayniqsa, har bir tarbiyalanuvchining kelajagiga umid bilan qarashlari, unga individual yondashishga harakat qilishlari, tarbiyaviy jazolash usullarini tartibsiz qo’llamasliklari, o’quvchilar jamoasi oldiga istiqbolli tarbiyaviy maqsadlarni qo’yishga intilishlari lozim. Yosh tarbiyachilar ma’lum bir pedagogik mahorat sirlarini egallashga intilmasalar, o’z fanidan bilimlari sayoz bo’lsa, shaxslararo munosabatlarga ijodiy yondashmasalar, kommunikativ qobiliyatini takomillashtirib bormasalar, tarbiyalanuvchilar uni asta - sekin tan olmay qo’yishadi. Natijada tarbiyachi va tarbiyalanuvchilar muloqotida tuzatib bo’lmas xatoliklar paydo bo’lishi mumkin.

Yosh avlodning o’sib ulg’ayishi va shakllanishiga hayot, ijtimoiy muhit qonuniyatlari ham muntazam ta’sir etadi. Muhit ijtimoiy omillarning eng muhim xususiyati bo’lib, u shaxsga ijobiy yoki salbiy ta’sir ko’rsatishi mumkin. Muhit deganda, shaxsning tarbiyalanib, shakllanishiga ta’sir etuvchi tashqi olam voqealari, hodisalar majmui tushuniladi. Muhit tushunchasi o’zida geografik-hududiy, ijtimoiy va mikromuhit xususiyatlarini ifodalaydi. Ayniqsa, oila, maktab, do’stlar davrasi, tengqurlar kabilarni o’z ichiga oladigan mikromuhit shaxsni tarbiyalash jarayoniga muhim ta’sir etishi pedagog va psixolog olimlar tomonidan e’tirof etilgan. Oila muhiti tarbiyalanuvchining tarbiyasi va barkamol inson sifatida shakllanishida o’ziga xos muhim

tarbiyaviy ta’sirga ega. SHuning uchun tarbiyachi muloqotni tashkil etishda ota-onalar, mahalla faollari, tarbiyalanuvchilar jamoasi faollari, uchastka nozirlari bilan doimiy aloqada bo’lib, ular bilan birgalikda faoliyat olib borishi kerak. Muloqotda ijtimoiy hayot qonuniyatlarini hisobga olish, tarbiyalanuvchilarni maqsadli tarbiyalashda muvaffaqiyatlarga erishish uchun zamin yaratadi.

Ta’lim tashkilotlarida tarbiyalanuvchi mehnat faoliyati bilan o’z qobiliyati va iste’dodini namoyon qiladi. Mehnat – yosh avlodni yuksak ongli, mustaqil fikrlay oladigan, xulq-atvorini namoyon qiluvchi, kasbiy qobiliyatlarini uyg’otuvchi, tarbiyaviy jarayonning eng qadimiy va sinalgan vositasidir. O’quv mehnati va ijtimoiy foydali mehnat tarbiyalanuvchi shaxsiga ijobiy ta’sir etadi, bu ikki faoliyat birligi bolani jismonan chiniqtiradi va faollashtiradi, xulq mukammalligini ta’minlaydi, tashabbuskor va izlanuvchan qilib shakllantiradi. SHunday ekan, tarbiyachi tarbiyalanuvchilar bilan muloqotni ularning mehnatsevarligiga yoki dangasaligiga qarab belgilasa ham bo’ladi. Ta’lim tashkilotlarida bolalarni ilk yoshidan boshlab mehnatsevarlik ruhida, mehnatga muxabbat va mehnat qiluvchilarga hurmat ruhida tarbiyalashda o’zaro muloqotning o’rni cheksiz. Ta’lim tashkilotlarida o’qishning o’zi ham mehnatdir. Muloqotdan maqsad, ta’lim-tarbiyaviy faoliyatda muvaffaqiyatlarga erishish uchun u mehnat tarbiyasi bilan aloqadorlikda olib borilishi lozim.

Tarbiyalanuvchilar ta’lim-tarbiya jarayonida milliy va umuminsoniy qadriyatlarni, axloqiy normalarni o’zlashtiradilar. *Tarbiyalanuvchi eng yaxshi insoniy fazilatlarini, axloq-odobni, muloqot madaniyatini asosan tarbiyachi timsolida anglab olishini unutmazlik kerak.* Tarbiyalanuvchilar jamoasida tarbiyachilar bilan o’zaro munosabatlar insonparvarlik tamoyillariga asoslanadi. Ular odatda ikki xil bo’lib biri rasmiy, ikkinchisi norasmiy muomala deyiladi.

Rasmiy muomala munosabatlari O’zbekiston Respublikasining Qonunlari, direktiv hujjatlariga asoslanadi.

Norasmiy muomala pedagogik etika va estetikaning qonuniyatlariga va tarbiyachi odobiga asoslanadi va jamoaning har bir a’zosi tomonidan ixtiyoriy ravishda bajariladi. Muloqot odobi psixologik qonuniyatlar, odob normalari va qoidalari, talablari hamda tarbiyachilar jamoasining fikri asosida boshqariladi.

#### **Foydalanilgan adabiyotlar**

1. Mirziyoyev Sh.M. Buyuk kelajagimizni mard va olijanob xalqimiz bilan birga quramiz. – T.: “O’zbekiston”, 2017.

2. O’zbekiston Respublikasi Vazirlar Mahkamasining 2019-yil 31-dekabrda “Uzluksiz ma’naviy tarbiya konsepsiyasini tasdiqlash va uni amalga oshirish chora-tadbirlari to’g’risida”gi 1059-son Qarori 1-ilovasi. // Qonun hujjatlari ma’lumotlari milliy bazasi, 03.01.2020 y., 09/20/1059/4265-son

3. Mirziyoyev Sh.M. Yangi O’zbekiston strategiyasi. – Toshkent: “O’zbekiston”, 2021. – 464 bet

4. AZ Baxodirovna [FORMATION OF A SPIRITUAL WORLDVIEW OF PRESCHOOL CHILDREN THROUGH THE MEANS OF GENRES OF FOLK ORAL CREATIVITY](#)

INTERNATIONAL JOURNAL OF SOCIAL SCIENCE &  
INTERDISCIPLINARY RESEARCH ISSN 2023